



28. februar 2011

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit:

1. **Peqqussutit suut tunngaviuppat, kalaallit nerisassaataat suliarineqarnikut kalaalimineerniarfinni tunineqarsinnaannginnerannut?**
2. **Naalakkersuisut inatsimmik allannguissaminnut pilersaaruteqarpat, kalaallit nerisassaataat igariaannangorlugit suliareriikkat kalaalimineerniarfinni tunineqarsinnaanngortinniarlugit?**
3. **Inuussutissanik nakkutilliinerup tigusasaanut suliaq sumut killippa?**

(Inatsisartuni ilaasortaq Astrid Fleischer Rex, Demokraterne)

Tunngavilersuut:

Maani Nuummi innutaaqataasut ilarpassuisa illoqarfup qeqqaani kalaalimineerniarfittaap ammarnissaa qilanaarisimavaat, isumalluartoqarmat amerlanerit kalaaliminertornerulersinnaanisaa. Ammarsimatsisartorlu paasinarsivoq kalaalimineerniarfittaap ajornartorsiutinik arlariinnik nassataqartoq.

Atuisorpassuit, piniartut aamma aalisartut naammagittaalliutigaat kalaalimerngit suliareriikkat kalaalimineerniarfinni tunineqarsinnaanngimmata soorlu aalisakkat panertut, nikkut, arfimerngit aamma tutut, paarnat, kuannit kiisalu pujuukkat.

Naalakkersuisoqatigiit isumaqatigiissutaanni allaqqavoq:

”Naalakkersuisut pingaartippaat, imminut pilersornerunissamut periarfissat misissorneqassasut aamma ineriartortinneqassasut ...”

aamma

”Inuussutissanik nakkutilliineq naalagaaffimmiit tigusassanut siullernut ilaatinneqassaaq.”

aamma



”Inuussutissanik nakkutilliineq kommuunini tamani nukittorsarneqassaaq aamma pitsanngorsarneqassaaq, kiisalu aamma pineqartumut inatsit Kalaallit Nunaannut pissutsinut naleqqusarneqassaaq.”

Demokraatini isumaqarpugut pingaarluinnartoq, kalaalimerngit tamatsinnut nuannaarutaanissaat aamma isumaqarpugut pineqartoq ineriartorteqqittariaqarlunilu pitsanngorsarneqartariaqartoq, tamaattumik Naalakkersuisut akissutissaannut qilanaarpugut.

Apeqqutit akeqquneqarput periarfissarititaasut ullut sulliviit qulit iluanni.